


元代子部書 二卷

元

代

史料刊  
史叢  
初編

黃山書社



元代子部書 二卷

元  
代  
史料叢刊  
初編

黃山書社

朝事饋食加羞之說籩人四籩之實 司尊彝朝

踐朝獻再獻饋獻

鄭司農云朝事謂清朝未食先進口食康成以司尊彝之職參之朝事謂祭宗廟薦血腥之事 饋食薦熟也

今古禮存者特牲少牢諸侯之大夫士祭禮也不裸不薦血腥而自薦熟始是以皆云饋食之禮 加籩謂尸

既食后亞獻尸所加之籩 羞籩謂若少牢主人酬尸

宰夫羞房中之羞于尸侑主人主婦皆右之也 紫陽

方氏曰此籩人肆籩所注也鄭司農朝事之說人子朝事其親之禮也康成謂之宗朝薦血腥之事其詳見司尊彝注今具于后 司尊彝春祠夏禴裸用鷄彝鳥彝皆有舟其朝踐用兩獻尊其再獻用兩象尊皆有罍秋嘗及烝裸用筭彝黃彝皆有舟其朝獻用兩著尊其饋獻用兩壺尊皆有罍凡四時之間祀追享朝享裸用虎彝雉彝皆有舟其朝踐用兩泰尊其再獻用兩山尊皆有罍鄭注裸謂以圭瓚酌鬱鬯始獻尸也后於是以璋

瓚酌亞裸既灌然後迎牲致陰氣朝踐謂血腥酌醴始  
行祭事后於是薦朝事之豆籩既又酌獻變朝踐為朝  
獻者尊相因也朝獻謂尸卒食王酌之再獻者王酌尸  
之後后酌亞獻諸臣為賓又次后酌盞齊備卒食三獻也  
於后亞獻內宗薦加豆籩其變再獻為饋獻者亦尊相  
因饋獻謂薦熟時后於是薦饋食之豆籩此凡九酌王  
及后各四諸臣一祭之正也回攷之朝事朝踐朝獻一  
也雖薦血腥有燔臠膋肝之事尸食此也饋食薦熟又

再燔之故有炳蕭合黍稷之說羞籩主人酬尸宰夫羞房中之羞于尸侑主人主婦羞尸也侑尸者必主人也主婦也宰夫以房中之羞羞之鄭以此解羞籩之實所羞者糗餌粉飧也朝事體熬蕡也體音逢字從麥故知為熬麥蕡符文反熬麻也子夏喪服傳白苴麻之有蕡者回見今藥舖有之曰麻仁熟藥有麻仁圓白熬稻也黑熬黍也爾雅有黑秬黍故以黑為黍因以白為稻形鹽築鹽為虎形也春秋傳曰鹽虎形李秀崑謂師中之

說近是康成以為鹽之似虎者殆非也回謂堆散鹽於器似不雅故餽為虎形周公作此禮必有所本否則兒戲耳今釋奠有此虎形鹽臠火吳反腓魚為大臠也腓章涉反或曰豕肉也鮑乾魚也或曰魚包也鱠所求反乾魚之折者也以上凡八物凡八籩 饋食棗也棗也桃也乾□也□音老梅乾也榛實也凡五物鄭氏又曰有桃諸梅諸內則之文也 賈氏曰桃梅有乾濕則棗中亦宜有乾濕通為八物八籩

加籩菱芡脯桌脯重言之者以四物為八籩菱古稱芡  
今菱角芡今鷄頭桌古栗字鄭康成謂栗與饋食同鄭  
師中謂栗脯當作脯修避饋食之栗肉脯薄切者肉修  
捶之而施薑桂者捶之藁反 羞籩糗餌粉飡餌粉稻  
而合蒸之粉飡粉稻而為乾餅李秀崑從康成不從師  
仲糗熬大豆與米粉豆屑亦不從此四物乎兩物乎亦  
八籩四籩乎豆法當各三十二豆三十二籩

六尊六彝舟壘之數

鄭司農云舟尊下臺若今時承槃獻讀為犧犧尊飾以翡翠象尊以象鳳凰或曰以象骨飾尊明堂位曰犧象周尊也春秋傳曰犧象不出門尊以裸神罍神之所飲也詩曰瓶之罄矣維罍之耻竽讀為稼稼彝畫禾稼也黃彝黃目尊也明堂位曰夏后氏以鷄彝殷以竽周以黃目爾雅曰彝卣罍器也著尊者罍尊也或曰著尊著地無足明堂位曰著殷尊也壺者以壺為尊春秋傳曰尊以魯壺追享朝享謂禘祫也在四時之間故曰間祀

雖讀為蛇虺之虺或讀為公用射隼之隼大尊太古之  
瓦尊山尊山罍也明堂位曰泰尊有虞氏之尊也山罍  
夏后氏之尊也故書踐作餞杜子春云餞當為殘玄謂  
黃目以黃金為目郊特牲曰黃目鬱氣之上尊也黃者  
中也目者氣之清明者也言酌於中而清明於外追享  
謂追祭遷廟之主以事有所請禱朝享謂朝受政於廟  
春秋傳曰閏月不告朔猶朝於廟雖禺屬印鼻而長尾  
山罍亦刻而畫之為山雲之形 紫陽方氏曰此春官

之屬也回著論天官二十四官王曰膳飲祭祀賓客牲  
牢鼎俎豆籩之事及於朝事饋食加籩豆之數則不容  
不書六尊六彝舟罍之所以然云

王日一舉鼎十有二物皆有俎 后與王同庖

王日一舉鼎十有二物皆有俎注殺牲盛饌曰舉王日  
一舉以朝食也后與王同庖鼎十有二牢正鼎九陪鼎  
三物謂牢鼎之實亦九俎正義曰言王日一舉者謂一  
日一太牢鼎十有二者按郊特牲鼎俎竒而籩豆偶者

謂正鼎九陪鼎三即是竒數揔而言之即十二云物皆有

俎者俎據正鼎而鼎各一俎 紫陽方氏曰正鼎九陪

鼎三其曰牢鼎之實其馬牛羊豕犬鷄王之膳用六牲

六鼎乎魚不入鼎入庶羞腊一鼎乎馬牛羊腸胃一鼎

乎祭肺煑於何處用何鼎鑊以為鑊烹煮之而後升於

鼎由鼎升之俎此九鼎而九俎也臠腳臠牛羊豕之臠

不升俎者陪鼎三者此物也升之豆在庶羞之列先儒

論王膳多言太牢牛也不言殺馬何也一日三食言日

一舉者指殺六牲而言也言王不言后者知后與王同庖也

王齊日三舉三太牢朔食兩太牢

王齊日三舉釋曰齊謂散齊致齊必變食故加牲體至三太牢

按玉藻曰朔食加日食一等則於此朔食當兩太牢

矣紫陽方氏曰王膳用六牲馬為首牛羊豕次之今但言一舉為一太牢三舉為三太牢或兩太牢不言馬

何也豈馬亦太牢乎王齊之日三太牢加盛饌也近世齊輒不食肉用僧徒之說菜茹終日豈禮乎

不舉有二

如後世避殿  
減膳徹樂

大喪大荒大札天地有哉邦有大故則不舉大荒凶年大札喪癘天裁日月晦食地裁崩動大故寇戎之事鄭司農云大故刑戮也春秋傳曰司寇行戮君為之不舉紫陽方氏曰不舉之說有二不殺牲一也不聽樂二也王膳用六牲以樂侑食盛其饌而備其音王齊則不

侑食以樂而加三舉如凶年之類則不殺牲如刑人之類則不聽樂如後世人主下詔避殿減膳徹樂也

王以樂侑食

正義以樂侑食即是王制云天子食日舉以樂按論語微子云亞飯三飯四飯鄭云此舉食之樂彼諸侯禮尚有舉食之樂明天子日食當有舉食之樂可知按大司樂云王大食皆令奏鐘鼓彼大食自是朔食日舉之樂無妨日食自有舉食之樂 紫陽方氏曰然不知王食

之侑果何樂也

玉藻用禮牢食之異

趙商問康成王日一舉鼎有十二是為三牲備焉玉藻曰天子日食少牢朔月大牢禮數不同請聞其說鄭答禮記後人所集據時而言或以諸侯同天子或以天子與諸侯等禮數不同難以據也周禮周公太平法玉藻據衰世或是異代故與此不同 紫陽方氏曰正義中有趙商與康成問答此其一也禮記出於漢儒王制尤

多舛刺不但玉藻也明堂位之誇魯謂君臣未嘗相弑  
禮樂刑法未嘗相變然魯弑三君士有誅始莊公婦人  
鬻而弔始臺駘豈不誣哉周禮一書亦何可盡信出於  
劉歆之手五帝之說因秦西時始於漢高祖曰待我而  
五故漢人必祀五帝尚書注上帝偽為孔安國傳者亦  
曰五帝皆漢俗儒泥於目之所見也可疑指者不一可  
盡信乎月令五帝呂不韋之書附會世俗偽孔安國書  
傳朱文公謂魏晉間人所為吾輩讀書當具法眼